

KUA IN KEI HONGSUKHA!

Siluangnatna avei numei nu in, Topa' puanmong honglawn khakciangin, damna ngahhi (Mk 5:27-29). Topa in amatung panin vangliatna paikhia hi cih atheih ciangin, kua in hongsu kha hiam ci-in, anungzui te kiangah donghi (Mk 5:30). Nungzuipi te leh amah azui mihonte in, Topa in bang gen nuamhiam cih tel zolo, thei zolo ahih manun, "mihon pi in nanghong nehin, hongnaih uhhi napi in banghangin kua in hongasukha hiam ci-in dongzenzen nahi hiam," (Mk 5:31) ci-in, lehdotkik uhhi. Cihnopna ah, mihing hizah in hongneh ahih manin, hongki sukha dingmah hi, ahi dingmah hi. A ngeina hi, leitung ngeina hi, aci ahi uhhi. Ahi zongin, Pasion ading in apiang thukhat peuhpeuh in thupha hang leh, ama vangliatna hangtawh apiang ahih manin, Topa in angeina hi, ahi dingmah hi, hong kisukha dingmah hi, naci hetlo hi. Kua in hongasukha na hi uhhiam ci-in dong teitei hi. Midangte in atel loh uh hangin, tua numei nu in, Topa in banggen hiam, banghang donghiam, bangdeihna tawh donghiam cih thu telpah hi. Tua ahih manin, adamkhit ciang kisello in, Topa kiangah amahmah langtakin hongki pulaakkhia hi. Topa in, numei nu kiangah, "Ka tanu aw, na upna in nang hongdam sakzo hi, lungnuamtak in ciah in," (Mk 5:34) ci-in thupha tawh ciah sak hi.

Hih Laisiangtho sungah bang lungdamna thupha i mu thei hiam? Pumpi natna pan damna angah numei nu hampah sa in, thupha ngah i sa dinghi. Tua bek tawh i lungkim dinghiam? Topa in, pumpi phattuamna thupha bek hongpia hi leh, "kua in hongsu nahi uhhiam," ci-in donghetlo ding hi. Banghanghiam cih leh, Topa' puanmong alawnphet in, tua numei nu in, dam na angakhinsa ahihi. Tua hi leh, kua in hongsu nahi uhhiam cih Topa' kammal in bang lungdamna thu honggen ahi hiam? Mipi te leh nungzuipi te mahbangin, Topa' kammal ii deihna leh khiatna theilo, tello, kanlo in, apiang bangbang ahi ding mah hi, leitung ngeina hi, i ci kha pahpah hi.

Topa in hongvei hi. Thupha apiakmi te theinuam hi. Ki ho nuamhi. Hongmu nuamhi. Thupha tawh apiangkha nakhem peunte in, Pasion vangliatna hi a, tua vangliatna in, leitung ngeina te kantan tawntung hi. Tua ahih manin, Pasion kammal leh, Pasion thu te leitungngeina vai bangin angaihsun mite adingin, Topa kammal in khatna neilo hi. Pasion in bangdeih hiam, bangzonghiam cih telzolo uhhi. Nungzuipi te in, Topa' nalamdang bawlte mumu in, Topa thugen zaza hinapi in, Topa' kammal in bangdeihna nei hiam cih natel zolo uhhi. Ahi zongin, numei nu in, Topa' kammal in, ama adingin bang khatna nei hiam cih thu siangtak leh teltak in thei hi. Bang ki lamdang i sa dinghiam? Tua numei nu in, Topa ii puanmong bek ahi zongin vasukhaleng damning cih upna nei hi. A upna in damna thupha ngahsak hi. A up manin, Topa tawh kiho kha hi. Alamet ngamloh, ngahding kilawm akisakloh, akigen thei lo thupha ahi, Topa tawh kamkumhun hongngah hithiat hi. Bang thuthuk i mutheilai dinghiam? Upna tawh Topa azuan te in, leitung thupha ahi pumpi damna, leitungvai pilna, thupha tuamtumte bek hilo, kha thuphalian ahi, Pasion kammal te tungah teltheihna pilna na ngahhi. Tua Topa' kammal, Topa' aw teltheihna in, Topa tawh kilawmtaakna hong ngahsak hi. Hih thuthuk lamdangsa lo in i omthei dinghiam?

Topa in thupha hongpia hi. Tua in, siluangnatna avei nu mahbangin, i kilawmloh nate, i lau nate ama mai-ah suahkhia in, thupha ngahnu thupha ngahpa keimah ka hihi, Topa aw, ci a, ama kiang azuan dingin, Topa in kua'n upna tawh kei hong sukha hiam ci-in, hongdong hi. Topa aw, nangkiangpan thupha paikhia in, tua thupha angah pen keimah ka hihi ci-in, hangtak leh kiniamkhatna lianpi tawh ama kiang azuan mite, Topa in, akicingzaw thupha tawh, na upna in nang hong damsakzo hi, lungnuamtakin na innlum na lolum zuankikin, ci-in thupha hongpia beh ding hi. Thupha i san simin, Topa in "Kua in Kei hongsukha na hi uhhiam," ci-in mitam pite lakah hongdong hi. Topa aw, kei mah hi ing, hih lai ah om ing, ci a adawng zoden dingin Topa in thupha hongpia ta hen. Amen.